

Ils abitadis da la Muntogna da Schons

■ Las vischnancas da la Muntogna da Schons sa chattan sin terrassas bassas e pli autas a sanestra dal Rain Posteriur e cumpiglian ils abitadis da Donat, Pazen, Farden, Lon, Maton, Vargistagn, Casti e Clugén.

Muntogna da Schons

Denominaziun da la spunda sanestra da la Val Schons, cuverta cun pauc gaud. Fin en il temp medieval tardiv ha vivi ina cuminanza da purs libers, ils uschenumnads Libers da la Muntogna da Schons, en quella regiun. Intgins privilegiads abitavan en il fons da la val. Il 1204 han ils *homines liberos de Saxammo* affittà sco cumproprietaris l'alp Niemet. En il contract da pasch dal 1428, stipulà tranter Clavenna ed ils vischinadis da la Val Schons, cumpara il mastral dal cumin da la Muntogna da Schons cun in agen sigil. Ils Libers da la Muntogna da Schons exercitavan la giurisdicziun civila probablmain en atgna cumpetenzza. Lur corporaziun pudeva decider autonomamain davart l'utilisaziun da gauds, pastgiras ed alps. Il lieu da reuniun sa chattava a Padagn en il territori da la vischnanca da Maton. La giurisdicziun criminala suttasteva als suverans comitals en la Val Schons. Ils dretgs da disponer da terrens e persunas, attribuids als Libers da la Muntogna da Schons, n'èn betg sclerids en detagl. Il plant preschentà il 1434 dals conts de Werdenberg-Sargans concernent la refusa da pajar tributs da prefectura sa drizzava era cunter ils Libers da la Muntogna da Schons. Suentar la Faida da Schons, prorutta a l'entschatta dals onns 1450, e la liberaziun da la val dals dretgs feudals il 1458, èn ils Libers da la Muntogna da Schons s'unids al cumin da Schons.

Jürg Simonett

Donat

Vischnanca politica, circuit Schons, district Rain Posteriur, cun las fracziuns da Donat e Pazen-Farden (fin la fin dal 2002 atgna vischnanca politica). Vitg situà lung la via al pe da la Muntogna da Schons a sanestra dal Rain Posteriur, cun ils quartiers da Curscheglias, Tarvisch e Tšcharvi. Ca. 1150 *ad Anede*, tudestg Donath (uffizial fin il 2002). 1835 167 abitants; 1850 188; 1900 128; 1950 118; 2000 133. Necropola dal temp da bronz tempriv a Surses. Enturn il 1150 era Donat ina gronda curt episcopala cun in'agricultura intensiva ed allevament da muvel. Al nordost da la vischnanca sa chattava la culegna bandunada da Scarsuir. Il 1204 è menziunada per l'emprima giada sin la Muntogna da Schons ina veglia cumunitad da purs libers ch'exercitava autonomamain la dretgira bassa. Ils dretgs da suveranità territoriala èn passads dals signurs de Vaz a quels de Werdenberg, il 1456 puspè a l'uestg da Cuira. La Val Schons è sa cumprada libra il 1458. Ecclesiasticamain appartegneva Donat a S. Martin a Ziràn (il 1463 è menziunada la chaplutta da S. Gieri). Refurmaziun enturn il 1530. A partir dal 1627 ha Donat constituì ina plaiv cuminaivla cun las vischnancas da la Muntogna da Schons inferiura, a partir dal 1863 puspè cun Ziràn. Fin il 1851 è Donat stà in vischinadi dal cumin da Schons e furmava cun Pazen, Farden, Casti e Clugén ina dretgira civila. Construcziun da l'emprima via charrabla 1901–02. Donat è il center scolastic da la Muntogna da Schons e la sedia da la mastralia da la val. Il 2005 lavuravan 57 % da las persunas cun activitad da gudogn a Donat en l'emprim sector (meglieraziun generala dapi il 1983). Part da la populaziun da lingua rumantscha: 1880 99 %; 1941 89 % (lingua materna); 2000 53,8 % / 75,6 % (meglra lingua/tuttas indicaziuns). Jürg Simonett

Pazen-Farden

Anteriura vischnanca politica sortida il 1875 da la fusiun da Pazen e da Farden



Vitget da Lon cun vista panoramica sur la Val Schons.

FOTO M. GYGER

(fin il 2002 uffizial Patzen-Fardün). Dapi il 2003 fracziun da la vischnanca politica da Donat. Adolf Collenberg

Pazen

Part da la vischnanca politica da Donat (dapi il 2003) e da la fracziun da Pazen-Farden, circuit Schons, district Rain Posteriur. Fin il 2002 ha Pazen appartegnì a la vischnanca politica da Pazen-Farden, cun la fusiun a la vischnanca da Donat han obtegnì ils nums rumantschs validitad uffiziala. Culegna serrada en la part sut da la Muntogna da Schons, unida cun Farden dapi il 1875. 1204 *Pazens*, tudestg Patzen. 1835 44 abitants; 1900 (cun Farden) 64; 1950 64; 2000 64.

Il territori communal appartegneva al terren colonisà e cultivà gia a l'entschatta dal 13avel tschientaner, cun allevament da muvel e cultivaziun dad ers. A partir dal 1204 è attestada sin la Muntogna da Schons ina vischnanca da purs libers cun in'atgna dretgira bassa. Ils signurs da Pazen, menziunads il 1219, eran ministerials episcopals. Ils dretgs suverans en la val han exequì successivamain ils de Vaz, ils de Werdenberg ed, a partir dal 1456, l'uestgieu da Cuira. Il 1458 èn ils da Schons sa cumprads libers. Ecclesiasticamain appartegneva Pazen a S. Martin/Ziràn. Il 1407 è vegnida fundada la chaplutta da S. Nicl a Farden (cun plevon). La refurmaziun ha gi lieu avant il 1538. Il 1627 è la vischnanca da Pazen sa separada ecclesiasticamain da Ziràn ed è s'unida cun Farden, Donat, Casti e Clugén ad ina plaiv. Fin il 1851 ha Pazen furmà cun ils vischinadis surmenziunads ina dretgira bassa entaifer il cumin da Schons. Construcziun dal stradun 1904–06, meglieraziun generala a partir dal 1980. La culegna viva oravant tut da l'allevament da muvel. Part da la populaziun da lingua rumantscha: 1980 83 % (lingua materna); 1990 63 % / 83 %; 2000 (Pazen-Farden e Donat) 53,8 % / 75,6 % (meglra lingua/tuttas indicaziuns). Jürg Simonett

Farden

Anteriura vischnanca politica, circuit Schons, district Rain Posteriur. Dapi il 1875 part da la vischnanca da Pazen-Farden, fusiunada il 2003 cun la vischnanca politica da Donat. Vitg situà a 1164 m en la part inferiura da la Muntogna da Schons. 1219 *de Faldaone*, tudestg Fardün. 1835 65 abitants; 1999 39. Il chastè-fortezza da La Tur (betg attestà) era probablmain la sedia dals signurs de Pazen. Legat da la chaplutta da S. Niclos 1407. Refurmaziun avant il 1538. Fin il 1851 ha Farden

furmà, entaifer il cumin da Schons, ina dretgira civila cun ils vischinadis da Pazen, Donat, Casti e Clugén. Construcziun dal stradun da Donat 1904–06. L'allevament da muvel predominescha. Part da la populaziun da lingua rumantscha 2000 (cun Pazen e Donat): 53,8 % / 75,6 % (meglra lingua/tuttas indicaziuns). Jürg Simonett

Lon

Vischnanca politica, circuit Schons, district Rain Posteriur. Vitg a mantun situà a 1582 m en la part sura da la Muntogna da Schons. Enturn 1150 *Laune, Lune*; 1219 *de Laone*, tudestg Lohn (uffizial). 1780 126 abitants; 1850 97; 1900 75; 1950 62; 2000 50. L'existenza d'ina veglia via auta per guntgir la chavorgia da la Viamala para oz pauc probabla. Gia a l'entschatta dal 13avel tschientaner era il terren da Lon urbarisà e cultivà (allevament da muvel e cultivaziun da graun). Dapi il 1204 è attestà sin la Muntogna da Schons ina cuminanza da purs libers cun in'atgna dretgira bassa. Signurs territorials èn stads, en successiun, l'uestg da Cuira, ils baruns de Vaz, ils conts de Werdenberg ed, a partir dal 1456, danovamain la diocesa. Il 1458 ha l'entira val cumprà ora ils dretgs signurils. Igl existan fastizs d'ina chaplutta dal 12avel tschientaner. Il process da separaziun da la pravenda da S. Martin a Ziràn ha inizià il 1460 cun la fundaziun da la chaplania da S. Maria ed è vegni terminà il 1538 cun l'instituziun da la cuminanza parochiala en la part sura da la Muntogna. Vers la mesadad dal 16avel tschientaner ha Lon aderì a la refurma. Fin il 1851 ha la vischnanca furmà in vischinadi dal cumin da Schons e constituì ina dretgira civila cun Maton e Vargistagn. Il 1904–06 è vegnida construìda la via charrabla. Il 2005 offriva il sector primar tut las piazzas da lavur en la vischnanca. Part da la populaziun da lingua rumantscha: 1980 100 % (lingua materna); 2000 52 % / 76 % (meglra lingua/tuttas indicaziuns).

Jürg Simonett

Maton

Vischnanca politica, circuit Schons, district Valragn. Il vitg accumulà, situà a 1521 m, furma il center da la part sura da la Muntogna da Schons. Ca. 840 *in Mentaune*, tudestg Mathon (uffizial). 1780 123 abitants; 1850 111; 1900 74; 1950 65; 2000 52. L'*ecclesia* menziunada en l'«Urbari curretic dals bains imperials» enturn il 840 correspunda probablmain a la baselgia da S. Martin da Ziràn. La tur d'abitat annectada ad ina chasa da purs datescha

dal 12avel/13avel tschientaner. Gia en il 13avel tschientaner tempriv vegniavan pratitgades en il vitg l'allevaziun da muvel e la cultivaziun dad ers. Dapi il 1204 era preschenta sin la Muntogna da Schons ina cumunitad da purs libers cun in'atgna dretgira bassa che sa radunava a Patagn (tudestg Pathein) sper Maton. Ils dretgs signurils, exercitads dals Vazs, alura dals Werdenbergs ed a partir dal 1456 da l'uestg da Cuira, èn vegnids cumprads ora il 1458. Ecclesiasticamain ha Maton fatg part da la plaiv da S. Martin a Ziràn fin a la refurmaziun. Il 1538 è vegnida instituìda ina plaiv autonoma sin la Muntogna Sura. Il 1728 han ins construì ina nova baselgia a Maton. Fin il 1851 ha Maton constituì in vischinadi dal cumin da Schons e furmava cun Vargistagn e Lon ina pitschna dretgira civila. La via charrabla è vegnida realisada il 1904–06. Il 2005 eran occupads dus terzs da la populaziun cun activitad da gudogn en il sector primar. La meglieraziun dal fons è vegnida terminada il 2005. Part da la populaziun da lingua rumantscha: 1990 80 % / 84 %; 2000 53,9 % / 82,7 % (meglra lingua/tuttas indicaziuns). Jürg Simonett

Casti-Vargistagn

Vischnanca politica, circuit Schons, district Rain Posteriur, constituìda il 1923 da la fusiun da las duas anteriuras vischnanca politica da Casti e Vargistagn, tudestg Casti-Wergenstein (uffizial). 1930 40 abitants, 1950 52; 1970 36; 2000 56. Jürg Simonett

Vargistagn

Anteriura vischnanca politica, circuit Schons, district Valragn, situada a 1485 m sin la Muntogna da Schons sura, reunida dapi il 1923 cun Casti a la vischnanca da Casti-Vargistagn. 1219 *Vergasteno*, tudestg Wergenstein (uffizial). 1808 85 abitants; 1850 68; 1900 22; 1920 23. Necropola dal 6avel e 7avel tschientaner, collocaziun d'in chastè, senza renviaments documentads. In sviament aut da la Püntcrap e da la Viamala vala oz sco betg probabel. La refurmaziun ha gi lieu avant il 1538. Chaplutta da S. Calixt (menziunada il 1538). Dal 1924–26 è vegni construì il stradun a Vargistagn ed il 1931 l'Hotel Piz Vizàn en possess da la Schweizerischer Metall- und Uhrenarbeiterverband (SMUV). Il 2004 è vegni avert il Center da Capricorns (center d'infurmaziun ed innovaziun). Per garantir il manaschi da l'hotel e promover il center regional è vegnida constituìda il 2003 ina Fundaziun Capricorn. Part da la populaziun da lingua ruman-

tscha: 2000 (Casti-Vargistagn) 55,4 % / 71,4 % (meglra lingua/tuttas indicaziuns). Jürg Simonett

Casti (Val Schons)

Anteriura vischnanca politica. Culegna serrada, situada en la part sut da la Muntogna da Schons, fusiunada il 1923 cun Vargistagn a Casti-Vargistagn. 1204 *ad Castellum*. 1835 29 abitants; 1850 27; 1900 23; 1920 20. Fastizs d'ina culegna fortitgada dal temp medieval tempriv e dal temp autmedieval en il conturn da la baselgia che datescha dal 12avel tschientaner (patrocinì nunenconuscent). Terren colonisà ed urbarisà gia a l'entschatta dal 13avel tschientaner. Il 1204 è documentada per l'emprima giada sin la Muntogna ina vischnanca da purs libers cun in'atgna dretgira civila. Ils dretgs suverans avevan l'emprim l'uestg da Cuira, alura ils baruns de Vaz ed ils de Werdenberg e suenter il 1456 puspè l'uestg da Cuira. Il 1458 è la val sa cumprada libra dals dretgs feudals. Ecclesiasticamain è la vischnanca da Casti sa separada da S. Martin a Ziràn pir suenter la refurmaziun (ca. 1530–35). Il 1627 furmava la culegna ina plaiv cuminaivla cun Donat, Pazen, Farden e Clugén, fin il 1851 ha ella constituì ina dretgira civila cun ils vischinadis surmenziunads entaifer il cumin da Schons. Construcziun da l'emprima via d'autos 1924–26. A Casti-Vargistagn, che viva oravant tut da l'allevament da muvel e da l'economia d'alp, è il rumantsch anc adina la lingua maioritara: 1880 99 % (lingua materna); 2000 55,4 % / 71,4 % (meglra lingua/tuttas indicaziuns). Jürg Simonett

Clugén

Anteriura vischnanca politica, circuit Schons, district Valragn. Fusiunada il 2009 cun la vischnanca politica dad Andeer. Vitg accumulà al pe da la Muntogna da Schons. 1243 *de Cloduno*. 1835 50 abitants; 1850 59; 1900 31; 1950 62; 2000 33. Gia a l'entschatta dal 13avel tschientaner terren colonisà ed urbarisà, cun allevament da muvel e cultivaziun da graun. Ruina dal chastè da Cagliatscha dal 13avel tschientaner. Il 1204 è documentada per l'emprima giada ina vischnanca da purs libers sin la Muntogna da Schons cun in'atgna dretgira civila. Ils dretgs suverans en la val han exercità l'emprim l'uestg da Cuira, alura ils de Vaz ed ils de Werdenberg e suenter il 1456 puspè l'uestg da Cuira. Il 1458 è la Val Schons sa cumprada libra. Ecclesiasticamain appartegneva Clugén a S. Martin a Ziràn. La baselgia datescha dal 12avel tschientaner (evtl. S. Sampley, menziunà ca. 1500), las picturas muralas realisadas en il stil dal Maister da Vuorz da ca. l'onn 1350. Refurmaziun 1530. Dal 1627–1894 ha Clugén furmà ina plaiv ensem cun las vischnancas da la part sut da la Muntogna da Schons, fin il 1851 in vischinadi dal cumin da Schons ed ina dretgira civila cun Donat, Pazen, Farden e Casti. Access a la via chantunala a Pignia Bogn 1951. Il 1981 ha la vischnanca purila, orientada vers Andeer, inizià la meglieraziun generala. Part da la populaziun da lingua rumantscha: 1880 100 %; 1941 61,3 % (lingua materna); 2000 3,0 % / 15,2 % (meglra lingua/tuttas indicaziuns). Jürg Simonett

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.